

## დეკანოზი ანდრია სალია - საეკლესიო პრობლემებს წმინდა სინოდის სხდომის მოწვევა სჭირდება



დეკანოზ ანდრია სალიას განცხადებით, პრობლემას წარმოადგენს ის, რომ ე.წ. ციანიდის საქმე წმინდა სინოდის სხდომაზე არ განხილულა. მისივე თქმით, საეკლესიო თემატიკაზე ღია მსჯელობები უკვე წლებია მიმდინარეობს.

ამასთან, დეკანოზის თქმით, მეუფე იაკობის განცხადებებმა აღნიშნულ თემაზე მსჯელობა განაახლა.

მეუფე იაკობის მიერ ორი დღის წინ გაკეთებულ განცხადებასთან დაკავშირებით დეკანოზი ანდრია სალია ამბობს, რომ სასულიერო პირის მხრიდან ასეთი ლექსიკით საუბარი მიუღებელია.

„თქვენ იცით, უკვე მერამდენე წელია მიმდინარეობს ღია მსჯელობები საეკლესიო თემატიკაზე. მეუფე იაკობის განცხადებამ განაახლა ეს თემა სამსჯელოდ, თუმცაღა უნდა ითქვას, რომ ეს არც ისე მოულოდნელია. მათი მხრიდან შეუფერებელი

განცხადებები და მეთოდები არაერთგზის გვიმხელთ, კიდევ ერთხელ გამოჩნდა და მე ღიადაც დავწერე, რომ ეს არის საპატრიარქოს ადმინისტრაციის სახე. რა თქმა უნდა, ეს ამავე დროს იწვევს ჩვენში ემოციას სიბრაულისას, ანუ სასულიერო პირი არ უნდა საუბრობდეს ამ ლექსიკით, ამ ფორმით, ხოლო შინაარსობრივ მხარეს რაც შეეხება, როგორც სასულიერო, ისე საერო ხელისუფლების ინტერესებში უნდა შედიოდეს, ციანიდის საქმიდან გამომდინარე, ყველაფრის განხილვა და განსჯა. თუ საეკლესიო, ანუ სინოდის კრებაზე არ იქნა საბოლოოდ შეფასებული, უფრო სავალალო შედეგამდე მივალთ. პირველ რიგში, არათუ თავის არიდებას უნდა ცდილობდეს საპატრიარქოს ადმინისტრაცია და გარეთ ტელევიზიებში ღიად სხვადასხვა პიროვნების გამოგზავნას, თავის ასე ვთქვათ შენარჩუნება – შენახვას, არამედ ღიადვე უნდა აფიქსირებდეს, რომ არსებობს პრობლემები და ამ პრობლემებს სჭირდება შიგნითვე განსჯა, საბოლოო წერტილის დასმა. როგორც მიტროპოლიტმა პეტრემ განაცხადა, საეკლესიო პრობლემებს სინოდის მოწვევა სჭირდება, რაც არ მომხდარა”, - აღნიშნა დეკანოზმა ანდრია სალიამ.

რაც შეეხება წმინდა სინოდის მოწვევის საკითხს, დეკანოზი ანდრია სალია აცხადებს, რომ ამის სურვილი მღვდელმთავრებს აქვთ, თუმცა საპატრიარქო დუმს.

„თქვენ ხედავთ, რომ ყველა მღვდელმთავარს სურს, ამ თემაზე საუბარი მიმდინარეობდეს, ეს თემა განიხილებოდეს შიგნით სინოდში, მაგრამ დუმს საპატრიარქო, დუმს სინოდის თავმჯდომარე, დუმან ის პირები, რომლებიც ამ შემთხვევაში ხელმწიფების ქვეშ არიან სინოდის მოწვევისა. სხვებზე დაბრალება გამიჭირდება, რადგან მათ ინტერესებში მაშინ არ უნდა შედიოდეს სინოდის მოწვევა. ვინც მთავარი მოტივატორია, როდესაც არ აკეთებს და არ აფიქსირებს აზრსა და თარიღს, ამ შემთხვევაში, მოწვევისა, შეუძლებელია სხვა ვინმეს დავაბრალოთ” , - განაცხადა დეკანოზმა ანდრია სალიამ.

მეუფე იაკობის მხრიდან, ხელისუფლების წარმომადგენლების მისამართით გაკეთებულ განცხადებებზე დეკანოზი ფიქრობს, რომ მოტივი „ ხელისუფლებასა და საპატრიარქოს შორის დაძაბვის მომენტი, ვიდრე სხვა რამ”.

მეუფე იაკობი საქართველოს კათოლიკოს-პატრიარქის ქორეპისკოპოსობიდან გადადგა. როგორც მეუფე იაკობმა აღნიშნა, დღეს სპეციალურად მივიდა საპატრიარქოში, რადგან პატრიარქისთვის თავისი გადანაცვლების შესახებ ეცნობებინა. ამასთან, მეუფე იაკობი, ქორეპისკოპოსობის გარდა, საფინანსო-ეკონომიური საბჭოს თავმჯდომარეობიდანაც გადადგა.

შეგახსენებთ, საქართველოს კათოლიკოს-პატრიარქის ქორეპისკოპოსმა, მეუფე იაკობმა ორი დღის წინ განაცხადა, რომ მას პატრიარქის გადაყენებასთან დაკავშირებით „ეჩაღიებოდნენ“. ამ საკითხზე საუბრისას, მეუფე იაკობმა აღნიშნა, რომ შეხვედრა მაშინდელი პრემიერ-მინისტრის, გიორგი კვირიკაშვილის, კაბინეტში

შედგა, რომელსაც, მისივე თქმით, ვახტანგ გომელაური და გიორგი გახარია  
ესწრებოდნენ. აღნიშნული განცხადება დღეს მან კიდევ ერთხელ დაადასტურა.

[1tv.ge](http://1tv.ge)